

Patka kržulja (*Anas crecca*) na Miljacki

Teal (*Anas crecca*) on the Miljacka: On 20 December 2009 on the Miljacka near Skenderija (Sarajevo) one Teal (*Anas crecca*) was recorded.

Koliko god kancelarijski posao bio tegoban za čovjeka ljubitelja prirode, toliko relaksirajuća može biti šetnja uz Miljacku, od Čobanije do Pofalića. Jest da tu ima i nekoliko „moćnih“ izljeva kanalizacije, ali patke gluhare (*Anas platyrhynchos*) kod Akademije likovnih umjetnosti i niže Vrbanja mosta skrenu pažnju sa tih slika. Na toj kratkoj relaciji posebno je, ipak, mjesto Skenderija, od stare električne centrale do ispod bivšeg računskog centra Privredne banke Sarajevo kojemu se, istina je, više ni temelji ne vide. Tu je, uvijek, najviše pataka gluhara (jedino veći broj bude niže mosta na Malti i kod Otoke), a zna biti i iznenađenja. Takvo jedno neočekivano i prijatno iznenađenje doživio sam 20. 12. 2009. godine. Na tom je mjestu, pored velikog broja gluhara bilo i devet riječnih galebova (*Larus ridibundus*) i tri galeba klaukavca (*Larus michahellis*), ali ono što je posebno popravilo turobni i već sivi dan bila je jedna patka kržulja (*Anas crecca*) u plićaku pored malog spruda, odmah ispod ostataka računarskog centra. Tako se, u posljednjih nekoliko godina, u opažanju liske (*Fulica atra*) kod Malte i malog gnjurca (*Tachybaptus ruficollis*) kod Bentbaše na Miljacki, u centru grada pridružila i jedna kržulja.

Jasminko Mulaomerović,
B.Zenunija 6, 71000 Sarajevo, jasminko.mulaomerovic@bhtelecom.ba